
Na osnovu člana 14. Zakona o sistemu indirektnog oporezivanja u Bosni i Hercegovini ("Službeni glasnik BiH", broj 44/03, 52/04, 34/07, 4/08, 49/09 i 32/13) i člana 21a. stav (2), 21h. stav (5) i 21d. stav (2) Zakona o akcizama u Bosni i Hercegovini ("Službeni glasnik BiH", br. 49/09, 49/14 i 60/14), Upravni odbor Uprave za indirektno oporezivanje, na 25. sjednici održanoj 06.11.2017. godine, donio je

ODLUKU
O UTVRĐIVANJU SPECIFIČNE I MINIMALNE AKCIZE
NA CIGARETE I IZNOS AKCIZE NA DUHAN ZA
PUŠENJE ZA 2018. GODINU

Član 1.

Ovom odlukom utvrđuju se iznosi posebne i minimalne akcize na cigarete i iznos akcize na duhan za pušenje, koji će se primjenjivati od 1. januara 2018. godine.

Član 2.

- (1) Od 1. januara 2018. godine, na cigarete se plaća akciza i to:
 - a) proporcionalna akciza po stopi od 42% na osnovicu utvrđenu u skladu sa članom 15. stav (1) tačka b) Zakona o akcizama u Bosni i Hercegovini ("Službeni glasnik BiH", br. 49/09, 49/14 i 60/14 u daljnjem tekstu: Zakon) i
 - b) specifična akciza u iznosu od 75,00 KM za 1.000 komada, odnosno 1,50 KM za pakiranje cigareta od 20 komada.
- (2) Za pakiranje različito od pakiranja navedenog u stavu (1) tačka b) ovog člana specifična akciza se plaća srazmjerno broju komada u pakiranju.

Član 3.

- (1) U skladu sa članom 21b. stav (4) Zakona, prema evidenciji o izdatim akciznim markicama Uprave za indirektno oporezivanje, prosječno ponderirana maloprodajna cijena cigareta u periodu od 1. jula 2016. godine do 30. juna 2017. godine iznosi 4,33 KM za pakiranje cigareta od 20 komada.
- (2) Minimalna akciza na cigarete se izračunava u visini od 60% na prosječnu ponderiranu maloprodajnu cijenu cigareta iz stava (1) ovog člana.
- (3) Primjenjujući metodologiju iz stava (2) ovog člana utvrđuje se minimalna akciza u iznosu od 130,00 KM za 1.000 komada cigareta, odnosno 2,60 KM za pakiranje cigareta od 20 komada.
- (4) Za pakiranja različita od pakiranja cigareta od 20 komada, minimalna akciza se plaća srazmjerno broju komada u pakiranju.
- (5) Minimalna akciza utvrđena u stavu (3) ovog člana primjenjuje se od 1. januara 2018. godine.
- (6) Ukoliko je ukupna akciza na cigarete koja je obračunata u skladu sa članom 2. stav (1) ove odluke manja od minimalne akcize iz stava (3) ovog člana, plaća se minimalna akciza iz stava (3) ovog člana.

Član 4.

- (1) Akciza za duhan za pušenje utvrđuje se u visini od 80% minimalne akcize na cigarete utvrđene u članu 3. stav (3) ove odluke iskazane za 1.000 komada cigareta i iznosi 104,00 KM po kilogramu.
- (2) Akciza na duhan za pušenje utvrđena u stavu (1) ovog člana primjenjuje se od 1. januara 2018. godine.

Član 5.

- (1) Porezni obveznici i druga lica koja se bave prometom cigareta dužni su popisati zalihe cigareta na dan 1. januar 2018. godine obilježene akciznim markicama izdanim od 1. januara 2010. godine do 31. decembra 2017. godine i popisne liste dostaviti nadležnom regionalnom centru Uprave za indirektno oporezivanje (u daljnjem tekstu: Uprava) do 7. januara 2018. godine.
- (2) Porezni obveznici i druga lica koja se bave prometom duhana za pušenje dužni su popisati zalihe duhana za pušenje na dan 1. januar 2018. godine obilježene akciznim markicama izdanim od 1. januara 2010. godine do 31. decembra 2017. godine i popisne liste dostaviti nadležnom regionalnom centru Uprave do 7. januara 2018. godine.

- (3) Porezni obveznici koji se bave prometom cigareta i/ili duhana za pušenje dužni su popisati količine akciznih markica za cigarete i duhan za pušenje preuzete do 31. decembra 2017. godine, a koje nisu iskorištene za obilježavanje cigareta i duhana za pušenje do 31. decembra 2017. godine i popisne liste dostaviti nadležnom regionalnom centru Uprave do 7. januara 2018. godine.
- (4) Popisne liste iz stava (1) i (3) ovog člana treba da, pored naziva obveznika ili drugog lica koje se bavi prometom cigareta i ID broja, sadrže sve elemente propisane članom 67. stav (1) tačka a) Pravilnika o primjeni Zakona o akcizama u Bosni i Hercegovini ("Službeni glasnik BiH", br. 50/09, 80/11, 48/12 i 74/14, u daljnjem tekstu: Pravilnik).
- (5) Popisne liste iz stava (2) i (3) ovog člana treba da, pored naziva obveznika ili drugog lica koje se bavi prometom duhana za pušenje i ID broja, sadrže sve elemente propisane članom 67. stav (1) tačka c) Pravilnika.

Član 6.

- (1) Porezni obveznici i druga lica koja se bave prometom cigareta i duhana za pušenje dužni su na zatečene zalihe utvrđene u popisnim listama iz člana 5. stav (1), (2) i (3) ove odluke obračunati akcizu shodno članu 2. stav (1) i članu 3. i 4. ove odluke, te do 17. januara 2018. godine uplatiti razliku između obračunate i već uplaćene akcize na Jedinstveni račun.
- (2) Porezni obveznici koji uvoze duhanske preradevine nakon 1. januara 2018. godine, a za koje su akcizne markice preuzete u periodu do 31. decembra 2017. godine, ne plaćaju razliku akcize pri uvozu, pod uslovom da nadležnom carinskom organu prilikom carinjenja prilože kopiju Upravi dostavljene popisne liste zaliha neiskorištenih markica na dan 1. januar 2018. godine, a poslije 17. januara 2018. godine i kopiju izvršene uplate razlike akcize iskazane u navedenoj popisnoj listi.
- (3) Kalkulaciju maloprodajne cijene formiranu shodno ovoj odluci, porezni obveznici su dužni dostaviti nadležnom regionalnom centru Uprave do 30. novembra 2017. godine.
- (4) Duhanske preradevine za koje je plaćena razlika akcize shodno stavu (1) ovoga člana, prodat će se po novim maloprodajnim cijenama, koje moraju biti istaknute na vidnom mjestu maloprodajnog objekta.

Član 7.

- (1) Ova odluka stupa na snagu osmoga dana od dana objave u "Službenom glasniku BiH", a primjenjuje se od 1. januara 2018. godine.
- (2) Danom početka primjene ove odluke prestaje da važi Odluka o utvrđivanju specifične i minimalne akcize na cigarete i iznos akcize na duhan za pušenje za 2017. godinu ("Službeni glasnik BiH" broj 84/16).

Predsjedavajući
Upravnog odbora

Broj 02-17-88/17
07. novembra 2017. godine

Vjekoslav Bevanda, s. r.